

# PEARLS OF ARMENIAN HERITAGE

## Մեր Տեր Հիսուս Քրիստոսի Համբարձման տոնը:

Հիսուս Քրիստոսն իր հրաշափառ հարությունից հետո <sup>40</sup> օր անցկացրեց իր աշակերտների հետ՝ պատմելով նրանց Աստծո արքայության մասին: Քրիստոնյաներիս համար ամենամեծ հրաշքը հարությունն է:

Մեր Տեր Հիսուս Քրիստոսը հարությունից անմիջապես հետո, մինչև համբարձվելը, շարունակեց հայտնվել իր աշակերտներին և նրանց ներկայությամբ հրաշքներ գործել: Իր աշակերտներին պատվիրեց մնալ Երուսաղեմում մինչև Պենտեկոստեի տոնը, ինչպես նաև հորդորեց, որ զնան և աշխարհին քարոզեն՝ առանց հեթանոսների և հրեաների միջև տարբերություն դնելու: Իր այս արարքով Քրիստոսն ուզում էր ցույց տալ, որ ինքը աշխարհ եկավ ամբողջ մարդկության համար՝ հավասարապես:

Նա առաքելներին իշխանություն տվեց, որ զնան և սովորեցնեն իր մասին, և բոլոր նրանք որոնք կնդունեն Հիսուսին՝ մկրտեն նրանց Հոր, Որդու և Սուրբ Հոգու անունով: Քրիստոսը նրանց պատվիրեց նաև մարդկությանը սովորեցնել այն ամենը, ինչ իրենք են սովորել Քրիստոսի հետ անցկացրած ժամանակ:

Հարությունից մինչև Համբարձում ընկած քառասնօրյա շրջանում բազում հրաշքներ տեղի ունեցան, որոնցից առաջինը Քրիստոսի հայտնվելն էր այն սենյակում, որտեղ հավաքվել էին իր աշակերտները: Առաքելներից Թովմասը, ով մյուսների հետ չէր, երբ Քրիստոսը առաջին անգամ հայտնվեց աշակերտներին, չհավատաց հրաշքին և ասաց, որ անձամբ է ուզում տեսնել և շոշափել Քրիստոսի ձեռքերի մեխերի տեղերը:

Ութ օր հետո աշակերտները դարձյալ հավաքվել էին նույն սենյակում, և Թովմասն էլ նրանց հետ էր: Թեև դռները փակ էին, Հիսուսը հայտնվեց և կանգնեց նրանց մեջտեղը և ասաց՝ «Խաղաղություն ձեզ»: Ապա ասաց Թովմասին. «Բեր քո մատը, դի՛ր այստեղ և տես իմ ձեռքերը՝ բեր քո ձեռքը և դիպցրո՛ւ իմ կողին, անհավատ մի՛ եղիր, այլ հավատացյալ»: Թովմասը բացական չեց. «Տեր իմ և Աստված իմ»: Հիսուսը ասաց նրան. «Դու հավատացիր, որովհետև ինձ տեսար, չէ՞ երանի՛ նրանց, որոնք հավատում են առանց ինձ տեսնելու»: (Հովհ, Ի <sup>20-29</sup>)

Հայ Առաքելական Եկեղեցու զավակները Թովմասի նման պետք է հավատան և ընդունեն Քրիստոսին առանց տեսնելու նրան, որովհետև Հիսուսը մեր մեջ է ամեն օր եւ ամեն վայրկյան: Մեր ամեն օրվա ապահովությունն ինքնին Աստծո և նրա Միածին Որդու Հիսուս Քրիստոսի օրհնության և ներկայության անհերքելի ապացույցն է: Անսասան լինենք մեր հավատի մեջ, և լինենք այն անձը, ով առանց տեսնելու Քրիստոսին՝ կհավատա նրա զորությանը:

Համբարձման տոնն այս տարին նշվում է մայիսի <sup>18</sup>-ին: Ամերիկայի Արևելյան թեմի հայ եկեղեցիներից մեկը, որ գտնվում է Կոնեկտիկուտ նահանգի Թրամբըլ քաղաքում, նվիրված է Քրիստոսի Համբարձմանը և կոչվում է Սուրբ Համբարձման եկեղեցի: Ամեն տարի մեր Տիրոջ հրաշափառ Համբարձման տոնի Ս. Պատարագը մատուցվում է այս եկեղեցում, որին ներկա են լինում եկեղեցուն մոտ գտնվող նահանգների հոգևորականները և հավատացյալները: